

BERITA HARIAN

DATE: 08 / 08 / 2007

LID platform promosi Malaysia: TPM

BH - 8/8/2007

LANGKAWI: Dialog Antara-bangsa Langkawi (LID) adalah cara baik untuk mempromosikan Malaysia serta membina hubungan dan mengukuhkan jalinan negara ini dengan negara peserta, kata Datuk Seri Najib Razak.

Timbalan Perdana Menteri berkata, LID ialah kesinambungan terhadap apa yang sudah dilaksanakan selama ini dan ia boleh menjadi platform yang baik untuk mempromosikan Malaysia serta membina hubungan dengan negara peserta.

Najib yang juga Menteri Pertahanan berkata demikian dalam satu temu bual sempena LID 2007 yang berlangsung selama tiga hari dan dirasmikan Perdana Menteri, Datuk Seri Abdullah Ahmad Badawi di sini, malam tadi.

Kira-kira 10 ketua negara dan ke-

rajaan yang kebanyakannya dari negara Afrika menghadiri LID kelapan ini. Edisi sulung LID diadakan pada 1995.

Lebih 500 peserta dari 40 negara juga menghadiri LID ini yang bertemakan Pembasmian Kemiskinan menerusi Pembangunan Modal Insan dan Pembinaan Keupayaan yang berlangsung di Berjaya Langkawi Beach and Spa Resort, sehingga Rabu.

Sehubungan itu, Najib berharap peserta LID kali ini akan 'membawa pulang sesuatu' berdasarkan pada pengalaman Malaysia dalam menangani isu seperti pembasmian kemiskinan.

"Memang mereka tidak dapat meniru semua apa yang sudah kita lakukan di negara mereka sendiri, tetapi kita (Malaysia) boleh menjadi asas yang baik bagi mereka untuk

FAKTA NOMBOR

LID

10

Ketua negara

500

Peserta

40

Negara peserta

berfikir bahawa kita berjaya melakukannya.

"Sesetengah pendekatan baru itu diambil dalam aspek pembangunan," katanya yang menyifatkan LID 2007 yang kini menekankan pembasmian kemiskinan adalah bersesuaian dengan keperluan negara peserta dari Afrika.

Najib berkata, Malaysia berjaya membina hubungan baik yang cemerlang (dengan negara peserta), tetapi bagaimana mereka boleh melaksanakan (program mengenai pembasmian kemiskinan) itu, terpulang kepada mereka.

Selain Malaysia, antara negara yang menyertai LID kali ini termasuk Botswana, Mozambique, Namibia, Zimbabwe, St Vincent and Grenadines, Kenya, Gambia, Uganda, Zambia, Sudan, Swaziland dan Lesotho. - Bernama